

Religiun sco element d'identificaziun

Ina retschertga represchentativa da las universitads da Lucerna e da Leipzig

DA MARTIN CABALZAR / FMR

■ Per 50 pertschient da la populaziun da la Svizra e per 57 pertschient da la populaziun da la Germania è religiun in impurtant element da l'identitad sociala. Quai resorta d'ina retschertga represchentativa realisada da scienziads da las universitads da Lucerna e Leipzig. En Svizra considereschan 13 pertschient dals interrogads la religiun sco «fitg impurtanta», sco quai ch'ils perscrutaders constateschan. Per 15 pertschient è la religiun «zunt impurtanta», mintgamai 17 pertschient la taxeschan ella per «nunimpurtanta» u per «plitost nunimpurtanta». Tut en tut èn mintgamai 3000 personas vegnidas interrogadas en ils dus pajais davart quest tema.

Fitg impurtant, dentant betg il pli impurtant

Religiun saja in'impurtanta cumponenta, dentant betg la pli impurtanta per l'identitad sociala, concludan ils perscrutaders. Cun 80 pertschient vegn la famiglia e cun flavel 70 pertschient amis ed enconuschents inditgads sco cumponentas fitg relevantas per il bainesser social. La religiun ranghescha tenor quest studi pir sin plaz 12 en la mesadad da la glista, quai anc avant chantun d'origin e regiun linguistica.

Il studi contatescha dentant era che identitads religiusas e socialas possian magari er esser il motiv per discriminaziuns. La dimensiun da discriminaziuns sin fundament da la religiun saja dentant



Tant en Germania sco en Svizra è la religiun in impurtant element da l'identitad sociala.

tut en tut fitg moderata tant en Svizra sco en Germania. Discriminaziun cunter religiuns dettia en Svizra cunzunt cunter commembras e commembers da baselgas libras (darar u savens: 69 pertschient) e cunter Muselmans (56 pertschient).

Religiun sparta e collia

La religiun possia sparter, dentant era colliar, contatescha il studi vinavant. Or d'in'optica generala furmia la religiun in element structural per ils differents tips d'identitad sociala. Cun agid da la religiun che servia sco identitad sociala vegnia era stgaffi distanza sociala e marginalisaziun. Uschia na vegn ina marida-

glia da cristians cun betg cristians betg tratga en consideraziun d'ina quarta dals cristians. Per radund 40 pertschient dals muslims na vegn ina maridaglia cun betg muslims esclusa.

La religiun na spartia dentant betg mo, anzi, ella promovia era la coesiun da la societad. Identitads socialas promovian correputentamain era l'engaschament voluntari. Quel engaschament voluntari promovia il contact tranter ils umans che n'avessian uschiglio betg l'ocasiun da s'inscuntrar. Uschia fetschia la religiun era punts.

Las personas che giuditgeschan l'identitad religiosa sco impurtanta,

quellas taxeschian tranter auter er il dialog interreligiun sco impurtant. La prontadad per il dialog vegnia considerata da las minoritads religiusas e cunzunt dals muslims per fitg impurtanta. Quai documenteschia il grond potenzial ch'in dialog saja avant maun en la societad.

Nov instrument da retschertga

Cun ina retschertga represchentativa fatga tar mintgamai radund 3000 interrogads en il rom dal project «Configuraziuns d'identitads individualas e collectivas e lur potenzials per la societad civila» vulan ils perscrutaders analizar tge influenza ch'identitads religiusas han sin process d'integraziun, resp. sin potenzials da conflict en Germania ed en Svizra. En in nov instrument d'interrogaziun han ils perscrutaders differenzià 12 identitads socialas pussaivlas ed uschia pudì definir a moda pli precisa che fin qua contexts socials e religius.

En tuts dus pajais han ils scienziads pudì eruir tschintg configuraziuns per identitads socialas: personas orientadas a la cuminanza, personas orientadas a l'ambient, personas orientadas a la famiglia e personas orientadas a sazezass.

L'identitad sociala da la religiun saja dentant tar tut las configuraziuns in impurtant element d'identificaziun. Sin quest sector dovria dentant ulteriuras retschertgas scientificas, remartgan ils perscrutaders.